

Iluarsiissutit

Siunnersuut 29. februar 2016-imik ullulerneqartoq taarserpaat

Tunngavilersuut

Inatsisissap oqaasertaani oqaaseqaatitaanilu erseqqissaassutaasunik imarisaanullu tunngasunik arlaqartunik allannguinnissaq Naalakkersuisut aalajangerpaat. Aamma § 27, imm. 3 misissueqqissaarner-nut aningaasartuutitut taamaallaat atuuttussanngortinneqarpoq, allannguullu taanna oqaaseqaatitut-taaq ilanngunneqarpoq.

Siunnersuut uunga: Kommunit Namminersorlutillu Oqartussat missingersuutaat naatsorsuu-taallu pillugit Inatsisartut Inatsisaat nr. xx, xx. xxx 2016-imeersoq

Kapitali 1

Inatsisip atortuuffia

§ 1. Inatsit atortussaatinneqarpoq kommuninut aamma Namminersorlutik Oqartussanut, taakku-nunnga ilanngullugit ingerlatsiveqarfinnut, naalakkersuisoqarfinnut, paaqqinnittarfinnut, suliffeqar-finnut il. il., taakku missingersuutaat kommunit ukiumoortumik missingersuutaannut imaluunniit Namminersorlutik Oqartussat aningaasanut inatsisaannut ilanngunneqarsimappata.

Imm. 2. Naalakkersuisut aalajangersinnaavaat inatsimmi malittarisassat aamma inatsit naapertor-lugu malittarisassat tamakkiisumik ilaannakortumilluunniit suliffeqarfinnut, peqatigiiffinnut, ani-ngaasaateqarfinnut il. il. atuutsinneqassasut:

1) taakku ingerlatsiner-mi imaluunniit naatsorsuutitigut amigartoorutaat kommuninit Namminersor-lutilluunniit Oqartussanit tapiissutitigut imaluunniit inatsit naapertorlugu tapersiilluni tunissuteqar-toqarneratigut, akitsuutitigut allatigulluunniit isertitatigut matussuserneqassappata, imaluunniit
2) kommuninit, Namminersorlutik Oqartussanit imaluunniit suliffeqarfinnit il. il. nr. I-imi ilaatinne-qartunit aningaasaliiffigineqartartunut, tapiissutisisartunut, taarsigassarsisinneqartunut, qularna-veequsiiffigineqartunut allatigulluunniit taperneqartunut, tassa aningaasaliissutit il. il. tigusisussap ingerlatsineranut annertuumik pingaaruteqarpata.

Imm. 3. Imm. 2 atuutsinneqassanngilaq inatsimmi allami suliffeqarfiup, peqatigiiffiup imaluunniit aningaasaateqarfiup missingersuusiornissaanut naatsorsuusiornissaanullu malittarisassanik aalaja-ngersaasoqarsimappat.

Kapitali 2

Missingersuutininik oqimaaqatigiissitsineq taarsigassarsinerlu

Missingersuutininik oqimaaqatigiissitsineq

§ 2. Missingersuutit tamarmiusut pisortat aningaasaqarneranni tamarmiusuni ukiut sisamat ingerlaneranni oqimaaqatigiissinneqassapput imaluunniit sinneqartoorfiussapput.

Imm. 2. Missingersuutit oqimaaqatigiissinneqarnissaannik piunasaqaat imm. 1-imi pineqartoq naammassineqarsimassaaq:

- 1) kommuni ukiumoortumik missingersuutaani imaluunniit Namminersorlutik Oqartussat aningaasanut inatsisaanni isertitat, ingerlatsinerit sanaartornerillu nalinginnaasut inernerit tamarmiusut ukiut sisamat ingerlaneranni amigartoorfiunngippata,
- 2) kommunit imaluunniit Namminersorlutik Oqartussat ingerlatsinerit aningaasartuutaat tamarmiusut ukiumut annerpaamik 1,5 procentinik qaffassimappata aamma ukiut sisamat ingerlaneranni qaffariaataat annerpaamik 2,00 procentiuppat, aamma
- 3) kommunit imaluunniit Namminersorlutik Oqartussat ingerlatsinerit nuussisarnermullu aningaasartuutaat tamarmiusut ukiut sisamat ingerlaneranni isertitassatut naatsorsuutigineqartut annerpaamik 93 procentiisut annertutigippata.

Imm. 3. Nalinginnaasumik isertitat tassaapput § 18, imm. 3-mi isertitanut pineqartunut sanilliullugu isertitat allat.

§ 3. Immikkut illuinnartunik pisoqartillugu piunasaqaatit § 2, imm. 2-mi pineqartut avaqqunneqarnissaannut Naalakkersuisut akuersissuteqarallarsinnaapput, avaqqussigallarnerup piffissaq ungasinnerulaartoq eqqarsaatigalugu attanneqarsinnaasumik aningaasaqarnermik aqutsineq navianartorsiortinngippagu.

Imm. 2. Pissutsit immikkut illuinnartut tassaapput pisut nalinginnaasuunngitsut Namminersorlutik Oqartussat nakkutigisinnaanngisaat aamma pisortat aningaasaqarnerannut tamarmiusumut pingaaruteqarluinnartumik sunniuteqartartut imaluunniit piffissat ilaanni aningaasaqarnikkut annertuumik kinguariatitsisartut.

§ 4. Aningaasaqarnermut Naalakkersuisoq ukiut tamaasa aprilip qaammataata naannginnerani missingersuutit aamma kommuninut tamanut Namminersorlutillu Oqartussanut tunngatillugit ukiuni sisamani aningaasanut inatsiseqarfiusuni inernerit § 2, imm. 2-mi, nr. 2-mi 3-milu pineqartut si-naakkutaat pillugit naatsorsuisassaaq.

Piginnaatitsissut

§ 5. Missingersuutinik naatsorsueriaasissaq pillugu Naalakkersuisut erseqqinnerusumik malittari-sassaliorsinnaapput.

Taarsigassarsineq

§ 6. Naalackersuisut inissialiornissamut, inuussutissarsiutitigut attaveqaatitigulluunniit pilersaarutitut aningaasaliissuteqarnissamut taamaallaat taarsigassarsisinnaapput imaluunniit taarsigassarsinissamut akuersissuteqarsinnaapput, taarsigassarsiat erniaat akilersorneqarnerallu atuisut akiliutaannit, pisortat aningaasartuutaasa ikilisinneqarnerannit imaluunniit pisortat isertitaqarnerunnerannit minnerpaamik aningaasalersorneqassappata.

Imm. 2. Piumasaqaataavorlu aningaasaliissutit imm. 1-imi pineqartut piffissami sivisuumi aningaasaqarnermik ingerlatsinerup attanneqarsinnaaneranut tapertaanissaat.

Kapitali 3

Aningaasaliissuteqarnermi tunngaviit

§ 7. Ukioq aningaasanut inatsiseqarfiusoq 1. januaarimiit 31. decembarip tungaanut sivisussuseqarpoq.

§ 8. Aningaasaliissuteqartoqaqqaartinnagu aningaasartuuteqartoqassanngilaq aamma isertitaqartoqassanngilaq, taamaattoq tak. § 23, imm. 2

Kapitali 4

Aningaasanut inatsit, ukiumoortumik missingersuutit il. il.

Namminersorlutik Oqartussat aningaasanut inatsisaat

§ 9. Naalackersuisut aningaasanut inatsisissatut siunnersuut ukioq aningaasanut inatsiseqarfiusus-saq sioqqullugu kingusinnerpaamik ulloq 1. september saqqummiutissavaat.

Imm. 2. Aningaasanut inatsisissatut siunnersuutip imarissavai Nunatta Karsiata ukiumi aningaasanut inatsiseqarfiusumi aningaasartuutai isertitaalu tamaasa.

§ 10. Ilanngaatitaqanngitsumik naatsorsuisarneq tunngavigalugu aningaasartuutissanut isertitassanullu missingersuutit aningaasanut inatsisissatut siunnersuummi immikkoortinneqassapput.

Imm. 2. Aningaasartuutissat missingersuutaanni ingerlatsinermi aningaasartuutit kiisalu isertitat tamarmik ilanngunneqassapput.

Imm. 3. Isertitassat missingersuutaanni naalagaaffiup Namminersorlutik Oqartussanut tapiissutai aamma akileraarutitigut akitsuutitigullu isertitat ilanngunneqassapput. Aamma iluanaarutit, pigisarnik nalilinnik tunisinerit, sanaartorneq il. il. isertitassatut aningaasaliissutinut ilanngunneqassapput.

§ 11. Aningaasanut inatsisitigut aningaasaliissutit naalackersuisup aalajangersakkat erseqqinnerusumik aalajangersarneqarsimasut malillugit atuinissaanut piginnaatitsissutaapput.

Imm. 2. Naalackersuisoq oqartussaaffimmi aningaasaliissutaanut akisussaasuvoq. Naalackersuisup akisussaasuusup aningaasaliissutit atorluarneqarnissaat qulakkiissavaa.

§ 12. Aningaasaliissutitut oqaasertaliisoqarsinnaavoq. Oqaasertaliussat taamaallaat aningaasaliissutit aqunneqarnissaannut tapertaassapput.

Imm. 2. Oqaasertaliussat ukiumi aningaasanut inatsiseqarfiusumi aningaasanut inatsimmut oqaasertaliiffiusumi taamaallaat atuutissapput.

Imm. 3. Oqaasertaliinikkut aalajangersakkat tigussaasut inatsimmut atuuttumut tapertaliunneqarsinnaapput. Oqaasertaliinikkut inatsimmik atuuttumik taamaallaat allannguisoqarsinnaavoq allannguutissaq piffissamut aalajangersimasumut killiligaappat.

Imm. 4. Oqaasertaliinikkut ataavartumik nalinginnaasumilluunniit inatsimmik allannguisoqarsinnaanngilaq.

Imm. 5. Oqaasertaliussat ukiumi aningaasanut inatsiseqarfiusumi tullermi aningaasaliissuteqarnissamut siuarsaasuussanngillat.

§ 13. Naalackersuisut aningaasanut inatsisissatut siunnersuutip suliarineqarnissaanut aaqqissuunneqarnissaanullu malittarisassaliorsinnaapput.

Imm. 2. Naalackersuisut aningaasat atorneqanngitsut ukiup tullianut nuutassat pillugit malittarisassaliorsinnaapput.

Imm. 3. Naalackersuisut immikkoortunut pilersaarusiornissamut immikkoortup pineqartup iluani periusissianik sukkulluunniit atuuttunik takutitsisunut malittarisassaliorsinnaapput.

Sanaartugassanut Iluarsagassanullu Aningaasaateqarfik

§ 14. Sanaartugassanut Iluarsagassanullu Aningaasaateqarfik missingersuusioriaatsimut naatsorsuusioriaatsimullu aningaasaateqarfiuvoq Nunatta Karsianut ilaatinneqartoq.

Imm. 2. Aningaasanut inatsit aqputigalugu sanaartugassanut aningaasaliissutit Sanaartugassanut Iluarsagassanullu Aningaasaateqarfimmi isertitatut naatsorsorneqassapput. Tamanna aamma atuuppoq sanaartugassanut aningaasaliissutitut kingusinnerusukkut Inatsisartut Aningaasaqarnermut Ataatsimiititaliaannit akuerineqartussanut.

Imm. 3. Sanaartugassanik pilersaarusiornermi aningaasartuutit Sanaartugassanut Iluarsagassanullu Aningaasaateqarfimmi aningaasartuutitut naatsorsorneqassapput.

Imm. 4. Ukiut aningaasanut inatsiseqarfiusut akornanni akiliutit nikingassutaat Sanaartugassanut Iluarsagassanullu Aningaasaateqarfimmi nalimmassarneqassapput.

Imm. 5. Sanaartugassatut pilersaarutini aningaasaliiffigineqartuni ataasiakkaani annikinnerusumik aningaasartuutaasut pilersaarut naammassineqarpat Nunatta Karsianut utertinneqassapput.

§ 15. Naalackersuisut Sanaartugassanut Iluarsagassanullu Aningaasaateqarfiup missingersuusior-tarnissaanut aningaasaliissuteqartarnissaanullu malittarisassaliorsinnaapput.

§ 16. Naalackersuisoq sanaartornermut akisussaasuusoq Sanaartugassanut Iluarsagassanullu Aningaasaateqarfimmi ataavartumik aqutsisuusaaq.

§ 17. Naalakkersuisut minnerpaamik ukiumut ataasiarlutik Sanaartugassanut Iluarsagassanullu Aningaasaateqarfiup suliai pillugit Inatsisartunut nassuiaasiortassapput, tassunga ilanngullugu suliniutit nutaat, suliniutit ingerlanneqartut naammassineqarsimasullu imaluunniit unitsiinnerneqarsimasut killiffii immikkut naatsorsussavaat.

Imm. 2. Nassuiaat kingusinnerpaamik Nunatta Karsiata naatsorsuutaasa saqqummiunneqarnerani naammassineqarsimassaaq naatsorsuutinullu ilanngullugu suliarineqassalluni.

Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfik

§ 18. Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfik missingersuusioriaatsimut naatsorsuusioriaatsimullu aningaasaateqarfiuvoq Nunatta Karsianut ilaattinneqartoq.

Imm. 2. Aningaasaateqarfiup siunertarivaa piffissamut ungasinnerusumut aningaasaateqarnissaq eqqarsaatigalugu aningaasaateqarfiup aningaasaataanik aningaasaliissuteqartarnissaq. Aningaasaateqarfiup aningaasaatai piffissaq ungasinnerusoq eqqarsaatigalugu toqqissisimanartumik, iluanaaru-taanerpaaffiusumik pitsaanerpaamillu inuiaqatigiit aningaasaqarnerannut sunniuteqarnissaat anguniarlugu aningaasaliissutigineqassapput.

Imm. 3. Aningaasaateqarfimmut akiliutit nuunneqartassapput immikkut ittumik isertitanit ukunanga:

- 1) Ingerlatseqatigiiffiit nunanit allaneersut aatsitassarsiornermi misissuinerannut sanaartornerannullu atatillugu ingerlatseqatigiiffiup akileraarutaanit 30 mio. kr.-nik amerlanerusunit Nunatta Karsiata iluanaarutaanit pissarsiat.
- 2) Aningaasarsianit akileraarutit pillugit Inatsisartut Inatsisaanni § 72 b naapertorlugu akileraarutit A-t.
- 3) Namminersorlutik Oqartussat pigisaannik 50 mio. kr.-t sinnerlugit nalilinnik tunisaqarnermit iluanaarutit.
- 4) Soraarnerussutisiassanik imaluunniit inuunermut sillimmasiisimanernik Danmarkimi, Savalimmiuni nunaniluunniit allani soraarnerussutisiassanut aningaasaateqarfimmut nuussinernit imaluunniit inuunermik soraarnerussutiassanillu sillimmasiisarfimmit Kalaallit Nunaanni najugaqartumit akileraarutinit akitsuutinillu iluanaarutit.
- 5) Nunatta Karsiata naatsorsuutaanit sinneqartoortutit ukiup aningaasanut inatsiseqarfiusup kingorna ukiup naannginnerani atorineqarsimanngitsut.

Imm. 4. Imm. 3 naapertorlugu iluanaarutit tiguneqarnerannit kingusinnerpaamik qaammatip ataatsip qaangiunnerani aningaasaateqarfimmut nuunneqassapput.

Imm. 5. Imm. 3 malillugu akiliutigineqartut Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat naapertorlugu isertitanut Kalaallit Nunaata Aatsitassarsiornermi Aningaasaateqarfianut ikineqartussanut imaluunniit Namminersorlutik Oqartussat aatsitassanit isertitaqarsinnaatitaanerat aamma ataatsimoortumik tapiissutisisinnaatitaanerat pillugu inatsit naapertorlugu isertitanut ilaatinneqanngitsut naalagaaffiup Namminersorlutik Oqartussanut ataatsimoortumik tapiissutaannik ikilisitsissapput.

Imm. 6. Ukiut aningaasanut inatsiseqarfiusut akornanni akiliutigineqartut nikingassutaat aningaasaateqarfimmi nalimmassarnejassapput.

Imm. 7. Aningaasaqarnermut Naalakkersuisoq aningaasaateqarfimmik ataavartumik aqutsisuus-saaq.

Imm. 8. Naalakkersuisut aningaasaateqarfiup missingersuusiortarnissaanut naatsorsuusiortarnis-saanullu malittarisassaliorsinnaapput.

Imm. 9. Naalakkersuisut minnerpaamik ukiumut ataasiarlutik Piffissaq ungasinnerusoq eqqarsaati-galugu aningaasaliissuteqarnissamut Aningaasaateqarfiup suliai pillugit Inatsisartunut nassuiaasior-tassapput, tassunga ilanngullugu suliniutit nutaat, suliniutit ingerlanneqartut naammassineqarsima-sullu imaluunniit unitsiinnarneqarsimasut killiffii immikkut naatsorsussavaat. Nassuiaat kingusin-nerpaamik Nunatta Karsiata naatsorsuutaasa saqqummiunneqarnerani naammassineqarsimassaaq naatsorsuutinullu ilanngullugu suliarineqassalluni.

Imm. 10. Naalakkersuisut aningaasaateqarfiup aningaasaataanik aningaasaliissuteqartarnissaq pil-lugu erseqqinnerusumik aalajangersagaliorsinnaapput.

Aningaasaliissutit nutaat allanngortitaluunniit

§ 19. Naalakkersuisut ilassutitut aningaasaliiffigineqarnissamik qinnuteqaasiornissamut erseqqin-nerusunik aalajangersagaliorsinnaapput.

Kommunit ukiumoortumik missingersuutaat, ukiunut arlalinnut missingersuutaat il. il.

§ 20. Aningaasaqarnermut Ataatsimiititaliaq kommunip ukiumut aningaasanut inatsiseqarfiususamut tullermut ukiumoortumik missingersuutissaanik kommunalbestyrelsimut siunnersuusiussaaq. Siunnersuutit ukiunut tulliuttunut minnerpaamik pingasunut missingersuusianik imaqassapput.

Imm. 2. Ukiumoortumik missingersuusiap imarissavai kommunipisertitassai aningaasartuutissaalu tamarmiusut kiisalu kommunip aningaasaataasa tigorianaat aamma aningaasaqarnikkut naatsorsuutaasa nikingassutaat.

Imm. 3. Ukiumoortumik missingersuusiaq aningaasartuutissanut, isertitassanut aamma nikerartusanut allanut ilimagineqartunut tamatigut takussutissaassaaq.

Imm. 4. Ukiumoortumik missingersuusiaq tunngavissiissanngilaq taarsigassarsinissamut, attartornissamut imaluunniit attartortitsinissamut, tassa Naalackersuisunit akuersissummik pisariaqartinneqartumik tunniussisoqarsimatinnagu imaluunniit kommunalbestyrelsip malittarisassat atuuttut naapertorlugit Naalackersuisunit akuersissummik pissarseqqaarani taarsigassarsinissaanut, attartornissaanut imaluunniit attartortitsinissaanut.

Imm. 5. Naalackersuisut missingersuusiornissamut aamma ilassutitut aningaasaliissuteqarnissamut malittarisassaliorsinnaapput kiisalu kommunit aningaasaatissaannut tigorianaannut minnerpaamik piumasagaasiorsinnaallutik.

§ 21. Aningaasaqarnermut Ataatsimiititaliap ukiumoortumik missingersuutissatut ukiunullu arlalinnut missingersuutissatut siunnersuutai kommunalbestyrelsimi minnerpaamik sapaatit akunnerisa marluk akornanni marloriarlugit suliarineqassapput.

Imm. 2. Ukiumoortumik missingersuutissatut siunnersuut kommunalbestyrelsimi siullermeerlugu suliarineqarnissaa minnerpaamik ullunik arfineq marlunnik sioqqullugu kommunip nittartagaatigut tamanut saqqummiunneqartassaaq.

Imm. 3. Ukiumoortumik missingersuutissatut aamma ukiunut arlalinnut missingersuutissatut siunnersuutit marloriarlugit suliarineqarnissaannut periusissatut malittarisassat kommunalbestyrelsip suleriaatsimini aalajangersassavai.

Imm. 4. Ukiumoortumik missingersuusiap aappassaaneerlugu oqaluuserineqarnissaanut inaarutaasumik piffissaliussassaaq Naalackersuisut aalajangersassavaat, aamma ukiumoortumik missingersuusiami kommunalbestyrelsip inaarutaasumik akuersissuteqarnermini aningaasaliissuteqarfissanik isummerfigisassaani naatsorsuutit immikkoortiterneqarnissaannut malittarisassaliorsinnaapput.

Imm. 5. Ukiumoortumik missingersuutit akuersissutigineqarnerannit kingusinnerpaamik ullut 14-it qaangiunneranni taakku assilinerat Naalackersuisunut nassiunneqassapput.

§ 22. Ukiumoortumik missingersuutit ukiunullu arlalinnut missingersuutit akuersissutigineqarnerannit kingusinnerpaamik ullut 14-it qaangiunneranni kommunimi innuttaasunit takuneqarsinnaangussapput.

Imm. 2. Ukiumoortumik missingersuutit ukiunullu arlalinnut missingersuutit imaasa naatsumik nassuiarneqarnerat ukiup aningaasanut inatsiseqarfiusussap tulliata aallartinnginnerani kommunip nittartagaatigut tamanut saqqummiunneqassapput.

§ 23. Ukiumoortumik missingersuutini naatsorsuutit kommunalbestyrelsip ukiumoortumik naatsorsuutini akuersissuteqarnermini aningaasaliissuteqarfissanut tunngatillugit isummerfigisai § 21, imm. 3 naapertorlugu kommunip ingerlatsineranut pisussaaffiliipput.

Imm. 2. Aningaasaliissuteqarnissamut oqartussaaffik kommunalbestyrelsimiippoq. Suliniutit inatsisitigut, peqqussutitigut imaluunniit allatigut inatsisitigut aalajangersakkatigut peqqussutigineqartut pisariaqartitsinermi kommunalbestyrelse aningaasaliissuteqaqqaanngikkaluartoq aallartinneqarsinnaapput, aningaasaliissutilli piaarnerpaamik pissarsiarineqarsinnaasariaqarput. Kommunalbestyrelsillu aammattaaq aningaasaqarnermut ataatsimiititaliaq pisinnaatissinnaavaa ingerlatsinermi aningaasartuutissanik missingersuutiniittunik nikisiterisinnaanermut kiisalu sanaartugassanut aningaasaliissutiniq sanaartugassanut allanut nuussisinnaanermik.

Imm. 3. Ilassutitut aningaasaliissutaasut tamarmik aningaasartuutissatut akuersissutigineqartut qanoq matussuserneqarnissaannik paasissutissanik imaqaasapput, ukiunut missingersuusiorfiusunut kingunerisinnaasai ilanngullugit. § 21, imm. 3-mi ilassutitut aningaasaliissutiniq atuisinnaanermut assinguvoq.

§ 24. Naalackersuisut malittarisassaliorinnaapput kommunit

- 1) taarsigassarsinnaanerannut allanillu akiligassanik pisussaaffilersinnaanerannut,
- 2) qularnaveeqquisinnaanerannut allatigullu pisussaaffilersinnaanerannut,
- 3) attartornissamut attartortitsinissamullu isumaqatigiissuteqarsinnaanerannut, aamma
- 4) kommunit inatsit malillugu pisussaaffiginngisaminnik aalajangersimasumik akiliisarnissaannut assigisaannilluunniit neriorsuuteqarnissaannut.

Kapitali 5

Aningaasartuutiniq nakkutilliineq

Sioqutsisumik aningaasartuutiniq nakkutilliineq

§ 25. Kommunit tamarmik Naalackersuisullu tamarmik ukiumi aningaasanut inatsiseqarfiusumi piffissani aalajangersimasuni naatsorsuutit, paasissutissat allat aamma kommunip pineqartup oqartussaaffeqarfiilluunniit ataasiakkaat ukiumut aningaasanut inatsiseqarfiusumut tunngatillugu naatsorsuumminnik misissuisimanermi naliliinerat pigineqartut tunngavigalugit ukiumi aningaasanut inatsiseqarfiusumi aningaasaliissutissat sinnerlugit atuisoqassanersoq nakkutigissavaat.

Imm. 2. Kommunip naalackersuisulluunniit ataatsip imm. 1 naapertorlugu aningaasartuutunik nakkutilliinerata takutippagu kommunip pineqartup oqartussaaffeqarfiulluunniit ukiumut aningaasanut inatsiseqarfiusumut inaarutaasumik naatsorsuutaasa ukiumi aningaasanut inatsiseqarfiusumi aningaasaliissutissat sipporneqarsinnaasut, taava kommune pineqartoq naalackersuisorluunniit ukiumi aningaasanut inatsiseqarfiusumi aningaasaliissutissat sippuutissaattut naatsorsuutigineqartut matususerneqarnissaat anguniarlugu iliuuseqartoqarnissaannik aalajangiissaaq.

§ 26. Kommunit naalackersuisullu tamarmik ukiumi aningaasanut inatsiseqarfiusumi piffissani aalajangersimasuni § 25, imm. 1 naapertorlugu aningaasartuutunik misissuinermi kingullermi angusat pillugit paasissutissanik aamma § 25, imm. 2 naapertorlugu aalajangiussap imaanik Aningaasaqarnermut Naalackersuisoqarfimmut nalunaaruteqartassapput.

Imm. 2. Kommune ataaseq imm. 1-imi pineqartoq naapertorlugu nalunaaruteqanngippat Aningaasaqarnermut Naalackersuisoqarfiup kommune ullunik suliffiusunik qulinik piffissalerlugu nalunaaruteqaqqussavaa. Piffissaliussaq malinneqanngippat kommunip nalunaaruteqarnissaata tungaanut kommunimut ataatsimoortumik tapiissutissat 10 procentii uninngatinneqassapput. Nalunaaruteqartoqarpat ataatsimoortumik tapiissutissat uninngatinneqartut tunniunneqassapput.

Imm. 3. Aningaasaqarnermut Naalackersuisoqarfik paasissutissat nalunaarutigineqartut tunngavigalugit kommunit Namminersorlutilluunniit Oqartussat ukiumut aningaasanut inatsiseqarfiusumut aningaasartuutissaat isertitassatut naatsorsuutigineqartunit sippuisinnaanersut pillugit inaarutaasumik naatsorsuutunik misissuissaaq. Aningaasaqarnermut Naalackersuisoqarfik paasissutissanik allanik misissuinermut atugassaminik kommunimut imaluunniit Naalackersuisumut pissarsiniarsinnaavoq.

Imm. 4. Aningaasaqarnermut Naalackersuisoqarfiup imm. 3 naapertorlugu aningaasartuutunik nakkutilliinerata takutippagu ukiumi aningaasanut inatsiseqarfiusumi kommunit Namminersorlutilluunniit Oqartussat aningaasartuutaat pillugit inaarutaasumik naatsorsuutit kommunit Namminersorlutilluunniit Oqartussat ukiumi aningaasanut inatsiseqarfiusumi isertitaasa 2,5 procentii sinnerlugit sipporneqarsimasut, kommunalbestyrelsip kommune sinnerlugu imaluunniit Aningaasaqarnermut Naalackersuisup Namminersorlutik Oqartussat sinnerlugit ullut 30-t qaangiutsinnagit aningaasanit tamarmiusunit atorneqarsinnaasut killilissavaat, tassa ukiumi aningaasanut inatsiseqarfiusumi missingersuutit sipporneqarnissaannik naatsorsuutigisap annertoqqataanik killilissavaat, taamaattorli imm. 5 takuuk.

Imm. 5. Kommunimut tunngatillugu kommunalbestyrelsi imaluunniit Namminersorlutik Oqartusanut tunngatillugu Aningaasaqarnermut Naalackersuisoq ukiumi aningaasanut inatsiseqarfiusumi naatsorsuutigisatut sippuinerit sapinngisamik matususerniarlugit allatut iliuuseqarnikkut atorneqarsinnaasunik killiliisoqannginnissaa pillugu aalajangiisinnaavoq imaluunniit atorneqarsinnaasut killilimmik killilerneqarnissaat pillugu aalajangiisinnaavoq.

§ 27. Aningaasartuutininik nakkutilliinermi kingullermi inernerit takutippassuk aningaasartuutit inaarutaasumik naatsorsorneqarsimasut kommunit Namminersorlutilluunniit Oqartussat isertitassatut naatsorsuutigisaasa 2,5 procentii sinnerlugit amerlanerungaarsinnaasut, taava Aningaasaqarnermut Naalakkersuisup kommune Naalakkersuisunulluunniit ilaasortaq peqqusinnaavai § 25, imm. 1-imi aamma § 26, imm. 1-imi aalajangersakkanut sanilliullugu akulikinnerusumik aningaasartuutininik nakkutilliisarnissaannut paasissutissanillu tunniussisarnissaannik.

Imm. 2. Aningaasaqarnermut Naalakkersuisup kommune Naalakkersuisunulluunniit ilaasortaq peqqusinnaavai § 25, imm. 1-imi aamma § 26, imm. 1-imi aalajangersakkanut sanilliullugu akulikinnerusumik aningaasartuutininik nakkutilliisarnissaannut paasissutissanillu tunniussisarnissaannut, tassa aningaasartuutininik nakkutilliinerit tulleriiginnaat marluk inernerisa takutippassuk aningaasartuutit pillugit inaarutaasumik naatsorsuutit kommunit Namminersorlutilluunniit Oqartussat isertitassaa 2,5 procentii sinnerlugit amerlanerusinnaasut.

Imm. 3. Aningaasaqarnermut Naalakkersuisup pissutsit tamatumunnga pisussaaffiliippata, imm. 2-mi pineqartut atuuppata kommune Naalakkersuisunulluunniit ilaasortaq aningaasartuutininik misisueqqissaarnissamut peqqusinnaavai.

Aningaasartuutininik nakkutilliinissaq tulliuuttoq

§ 28. Kommunit tamarnik Aningaasaqarnermullu Naalakkersuisoqarfiup ukiumi aningaasanut inatsiseqarfiusumi nutaami kingusinnerpaamik qaammatit pingasut siulliit naaneranni misissussavaat ukiumi aningaasanut inatsiseqarfiusumi kingullermi aningaasartuutit pillugit naatsorsuutit kisitsisitaasa kommunip Namminersorlutilluunniit Oqartussat ukiumi aningaasanut inatsiseqarfiusumi kingullermi isertitaat sipporsimaneraat.

Imm. 2. Kommune ataaseq imm. 1-imi pineqartuq naapertorlugu nalunaaruteqanngippat Aningaasaqarnermut Naalakkersuisoqarfiup kommune ullunik suliffiusunik qulinik piffissalerlugu nalunaaruteqaqqussavaa. Piffissaliussaqaq malinneqanngippat kommunip nalunaaruteqarnissaata tungaanut kommunimut tapiissutissat 10 procentii uninngatinneqassapput. Nalunaaruteqartoqarpat tapiissutissat uninngatinneqartut tunniunneqassapput.

§ 29. Aningaasaqarnermut Naalakkersuisoqarfiup § 28, imm. 1 naapertorlugu aningaasartuutininik nakkutilliinerata takutippagu ukiumi aningaasanut inatsiseqarfiusumi kingullermi Namminersorlutik Oqartussat amigartooruteqartut, Aningaasaqarnermut Naalakkersuisoq ukiumut aningaasanut inatsiseqarfiusumut nutaamut Namminersorlutik Oqartussat aningaasaliissutaannik ullut 30-t qaangiutsinnagit appaassaaq, tassa ukiumi aningaasanut inatsiseqarfiusumi kingullermi Namminersorlutik Oqartussat amigartoorutaasa amerlaqataannik aamma taakku amerlaqataannik aningaasat ator-neqarsinnaasut killilissavai, taamaattoq tak. imm. 2.

Imm. 2. Aningaasaqarnermut Naalakkersuisup ukiumi aningaasanut inatsiseqarfiusumi kingullermi amigartoorutit iliuusissat allat aqqutigalugit matussusersinnaavai, ukiumi aningaasanut inatsiseqarfiusumi nutaami Namminersorlutik Oqartussat aningaasaliissutaasa appartinneqannginnissaat aalajangiiffigisinnaavaa imaluunniit taakku killilimmik appartissinnaallugit. Oqaaseqatigiinni siullerni pisut pineqartut pippata Aningaasaqarnermut Naalakkersuisoq taamatutaaq atorneqarsinnaasunik killiliisinnaavoq.

§ 30. Ukioq tapiiffiususaaq sioqqullugu ukiumi kommunip naatsorsuutai isertitat 2,5 procentiinit amerlanerusunik amigartooruteqarfiuppata Aningaasaqarnermut Naalakkersuisup Namminersorlutik Oqartussat kommunimut ataatsimoortumik tapiissutaat appaaffigissavai. Ukiumi amigartooruteqarfiusumi isertitat 2,5 procentii sinnerlugit amigartoorutaasut annertoqqataannik appaasoqassaaq.

Imm. 2. Appaanerit ukiumi tapiissuteqarfiusumi juulip, aggustip, septembarip, novembarip decembarillu qaammataanni annertoqqatigiimmik agguarlugit akilersorneqassapput.

Imm. 3. Naalakkersuisut imm. 1 naapertorlugu appaassutigineqartunik naatsorsuinissamut akilersuinissamullu erseqqinnerusumik malittarisassaliorsinnaapput, tassunga ilanngullugu naatsorsuusi-ormerit aamma missingersuutit naatsorsuutillu imminnut sanillersuunneranni aqqitassat pisariaqartut pillugit immikkut ittumik kukkunersiuinermi uppernarsaatinik pissarsiniarsinnaallutik.

Ilisimatitsinerit

§ 31. Aningaasartuutunik nakkutilliinermi angusat pingaarnerit pillugit Naalakkersuisut Inatsisartut Aningaasaqarnermut Ataatsimiititaliaannut kingusinnerpaamik 1. septembarimi aamma 1. decembarimi ilisimatitsissutigisassavaat aamma tamanna pillugu paasissutissanik Namminersorlutik Oqartussat nittartagaatigut tamanut saqqummiussisassapput.

Imm. 2. Naalakkersuisut qaammatit arfinilikkaarlugit Namminersorlutik Oqartussat nittartagaat atorlugu pisortat akiitsuisa tamarmiusut takussutissartaat tamanut saqqummiuttassavaat.

§ 32. Kalaallit Nunaata aningaasaqarnera pillugu ukiumoortumik nalunaarusiaq, tassunga ilanngullugu pisortat aningaasartuutaasa isertitaasalu ineriartornerat Naalakkersuisut Inatsisartut upernaakkut ataatsimiinneranni saqqummiuttassavaat. Ukiumoortumik nalunaarusiap imarissavai qitiumik aningaasartuuteqarfiusartuni isertitaqarfiusartunilu ataatsimi arlalinniluunniit aningaasaqar-nikkut suliaassanillu ingerlatsinerup misissuiffigeqqissaarneqarsimanerat.

Imm. 2. Aningaasanut inatsit ukiumi aningaasanut inatsiseqarfiusumi akuersissutigineqarpat nalunaarusiaq imm. 1-imi pineqartoq Naalakkersuisut saqqummiutinngitsoorsinnaavaat.

Aqutsinermi piginnaatitsissut

§ 33. Naalakkersuisut aningaasartuutunik nakkutilliisarneq pillugu erseqqinnerusumik malittarisassaliorsinnaapput.

Kapitali 6

Naatsorsuutit

Missingersuusiornermut Naatsorsuusiornermullu Siunnersuisoqatigiit

§ 34. Namminersorlutik Oqartussani naatsorsuuserinermi pisortaq aamma sinniisuutitat KANU-KOKA-mit, Naalackersuisunit kommuninillu tamanit toqqagaasut Missingersuusiornermut Naatsorsuusiornermullu Siunnersuisoqatigiinni ilaasortaapput. Siunnersuisoqatigiit missingersuutininut naatsorsuutinullu tunngatillugit pisortat ataatsimut soqutigisaannut tunngatillugu apeqqutini Naalackersuisunut siunnersuisassapput.

Imm. 2. Sinniisuutitaq Naalackersuisunit toqqagaasoq siunnersuisoqatigiinni siulittaasuusaaq, soorlu Naalackersuisut siunnersuisoqatigiinnut allattaanermik isumaginnittuussasut.

Imm. 3. Naalackersuisut Missingersuusiornermut Naatsorsuusiornermullu Siunnersuisoqatigiinnut tunngatillugu erseqqinnerusumik malittarisassaliorsinnaapput, tassunga ilanngullugu siunnersuisoqatigiit suleriaasissaat aalajangersaaffigisinnaavaat.

Namminersorlutik Oqartussat naatsorsuutaat

§ 35. Naalackersuisut ukiumut aningaasanut inatsiseqarfiusumut kingullermut tunngatillugu Nunatta Karsiata naatsorsuutai kukkunerisuisut allattugaat ilanngullugit kingusinnerpaamik Inatsisartut ukiakkut ataatsimiinneranni saqqummiuttassavaat.

Imm. 2. Nunatta Karsiat naatsorsuutaasa sananeqarnermikkut ukioq aningaasanut inatsiseqarfiusoq aamma ilassutitut aningaasanut inatsiseqarfiusoq malissavaat, imarissavaalu ukiumi aningaasanut inatsiseqarfiusumi kingullermi Nunatta Karsiata isertitai aningaasartuutaalu tamarmiusut kiisalu Nunatta Karsiata pigisai nalillit akiligassaalu aamma ukiup ingerlanerani atuisimanerit.

§ 36. Naalackersuisut Namminersorlutik Oqartussat naatsorsuuseriveqarnerat pillugu malittarisassaliorsinnaapput. Naalackersuisut malittarisassaliornerminni naatsorsuuseriveqarnerup iluani isumannaatsuunissap torersumillu ingerlatsinissap eqqarsaatigineqarnerisa saniatigut paasissutissanik aningaasaqarnermik pilersaarusiornermut, aqutsinermut nakkutilliinermullu atorneqartussanik pisarsisinnaaneq eqqarsaatigissavaat.

§ 37. Namminersorlutik Oqartussani naalackersuisoqarfiit, aqutsisoqarfiit suliffeqarfiillu il. il. § 1-imi pineqartut paasissutissanik Naalackersuisunut nalunaaruteqartassapput aamma naatsorsuusermi atortut Naalackersuisut Nunatta Karsiata naatsorsuutaanik saqqummiussinissamut pisariaqartitaat pissarsiarisassavaat.

§ 38. Nunatta Karsiata ukiumoortumik naatsorsuutaanik kukkunersiuisarneq kukkunersiuisunit naalagaaffimmit akuerisaasunit Inatsisartut toqqagaannit isumagineqartassaaq.

§ 39. Nunatta Karsiata naatsorsuutai pisortat kukkunersiuinermi ileqqorissaarnissaat naapertorlugu kukkunersiuisut kukkunersiortassavaat aamma Nunatta Karsiata naatsorsuinermi atortui isornartorsiuisumik misissortassavaat. Kukkunersiuisut ilaatigut naatsorsuutit eqqortuunersut misissortassavaat, aamma pissutsit naatsorsuutininik saqqummiussinermi pineqartut aningaasaliissutinut, inatsisinut najoqqutassanullu allanut kiisalu isumaqatigiissutigisanut aamma suleriaatsinut nalinginnaasunut naapertuunersut misissortassavaat.

Imm. 2. Kukkunersiuisoq Inatsisartut kukkunersiuinermut tunngatillugu piumasagaataanik malinnissaaq, piumasagaatit inatsimmut aamma pisortat kukkunersiuinermi ileqqorissaarnissaannut akertuunngippata.

§ 40. Naalackersuisut paasissutissanik naatsorsuutininik naliliinissamut pisariaqartinneqartunik kukkunersiuisunut nalunaaruteqartassapput.

Kommunit naatsorsuutininik nalunaarsuisarnerat naatsorsuutaallu

§ 41. Kommunip naatsorsuutaani nalunaarsorneqassapput kommunip aningaasaatai qanoq aquneqarsimanersut aammalu aquneqarnerat ukiumoortumik aningaasanut missingersuusianut kommunalbestyrelsillu aalajangiinerinut allanut naapertuuttuunersut.

Imm. 2. Kommunip aningaasaatai isumannaatsumik paarineqassapput. Aningaasat ullormut ator-neqartussatut tigoriaannaatinneqannigitsut aningaaserivimmuteqassapput imaluunniit obligationinut aningaasaliinermiluunniit uppersaatinut inissinneqassallutik aningaasaateqarfiit aningaasaataannik inissiiffigineqarsinnaasunut.

§ 42. Kommunip naatsorsuutai aningaasaqarnermut ataatsimiititaliamit kommunalbestyrelsimut saqqummiunneqassapput. Naatsorsuutinut ilaatinneqassapput:

- 1) kommunip qularnaveeqqusiinerinut, attartornerinut, attartortitsinerinut aamma qularnaveeqqu-siissuteqarnermi pissusaaffiinut nalunaarsuutit,
- 2) pisariaqartitsineq naapertorlugu pissutsit qanoq ittuunerannut nassuiaatit, minnerunngitsumik aningaasaliissutaasut naatsorsuutaasullu malunnaatilimmik nikingassuteqarneranni, aamma
- 3) kommunip aningaasaliiffigisassatut pilersaarutaanut, ukiunut arlalinnut missingersuusiaanut il. il. tunngatillugit pissutaasunut nassuiaatit

Imm. 2. Kommunilbestyrelsimut naatsorsuutinut nassuiaatit isummerfigissavai aamma naatsorsuuti-ni immikkuualuttut malitseqartinneqassanersut isummerfigissallugit, tamatumalu kingorna naatsor-suutit kommunalbestyrelsimut kukkunersiuisunut Naalackersuisunullu ingerlatissavai.

Imm. 3. Naalackersuisut naatsorsuutit saqqummiunneqarnissaat pillugu malittarisassaliussapput.

§ 43. Kukkuersiuisup oqaaseqaatai Aningaasaqarnermut Ataatsimiititaliamut nalunaarutigineqassapput. Aningaasaqarnermut Ataatsimiititaliaq ingerlatsivinnit aningaasaqarnermut ataatsimiititaliap toqqaannartumik ataaniinngitsunit akissuteqaatinik piumasaaqassaaq. Akissuteqaatit Aningaasaqarnermut Ataatsimiititaliap kommunalbestyrelsimut inassuteqaataani ataatsimoortuni ilaatinneqassapput. Kommunalbestyrelsip alajangiiffigissavaa ukiumoortumik naatsorsuutitut oqaaseqaataasut akissuteqarfineqarnissaat aammalu ukiumoortumik naatsorsuutit akuersissutigineqarnissaat.

Imm. 2. Kommunalbestyrelsi aalajangeereerpat, tak. imm.1, aalajangiussaq kukkuersiuisut oqaaseqaataat ilanngullugit Naalakkersuisunut nassiunneqassapput.

Imm. 3. Ukiumoortumik naatsorsuutit inaarutaasumik akuerineqarnerannit kingusinnerpaamik ulut 14-it qaangiunneranni kukkuersiuisut allattugaat ilanngullugit kommunip nittartagaani tamanit takuneqarsinnaangussapput.

§ 44. Kommunit tamarmik akuerisaasunik kukkuersiuisoqassapput kukkuersiuisunut inatsit sukkulluunniit atuuttoq tunngavigalugu. Kukkuersiuiueq Naalakkersuisunit akuerineqassaaq. Kommunalbestyrelsip kukkuersiuisoq akuerisaasoq asoortissappagu Naalakkersuisut akuersiteqqaartinneqassapput.

Imm. 2. Kommunip naatsorsuutai pisortat kukkuersiuiinermi ileqqorissaarnissaat naapertorlugu kukkuersiuisut kukkuersiortassavaat aamma kommunip naatsorsuinermi atortui isornartorsiuisumik misissortassavaat.

Imm. 3. Kukkuersiuisut sukkulluunniit nalunaaruteqaqqaaratik karsimik misissuisinnaatitaapput akuttunngitsunillu kommunip naatsorsuutaanik misissuisassallutik, tassungalu atatillugu nakkutillinermi iliuusissatut akuerisaasut, taakkununga ilanngullugit qarasaasiat atornissaannut najoqqutasiat toqqissisimanartuunersut misissorneqarnissaat siuunertaralugu.

Imm. 4. Kommunalbestyrelsi paasissutissanik pissarsinissamut paasissutissanillu kukkuersiuisut ingerlatsinerminni pisariaqartitaannik tunniussinissamut pisussaavoq.

Imm. 5. Imm. 3 naapertorlugu kukkuersiuisut suliaqarnerannut atatillugu § 43, imm. 1 aamma 2 kukkuersiuisut nalunaarutaannut atorneqarsinnaapput.

§ 45. Kommunalbestyrelse kommunip karsiata naatsorsuuseriviatalu aaqqissuussaananerannut suleriaaseqarnerannullu tunngatillugit malittarisassaliussaaq. Malittarisassaq kommunip kukkuersiuisuinut nassiunneqassaaq, taakkualu allannguutinik atulersitsinnginnermi tamatigut ilisimatinneqartassapput.

Imm. 2. Kommunip karsiata naatsorsuuseriveqarneratalu aqunneqarnissaannut, kontulersuisarnissamut, kukkuersiuisarnissamut aamma kukkuersiuisut oqaaseqaateqartarnissaannut Naalakkersuisut malittarisassaliorsinnaapput.

Kapitali 7

Aningaasaqarnermut Siunnersuisoqatigiit

§ 46. Naalackersuisut Aningaasaqarnermut Siunnersuisoqatigiit akit nikerarnerannik aningaasaqarnermillu ingerlatsinerup attanneqarsinnaanerannik nalilersuisussat pilersissavaat. Aamma Naalackersuisut siunnersuisoqatigiit qinnuigisinnaavaat inuiaqatigiit aningaasaqarnerannut pingaarutilinik allatigut siunnersoqqullutik.

Imm. 2. Aningaasaqarnermut Siunnersuisoqatigiit katitigaanerat, piffissaq atuuffissaat il.il. nalunaarutikkut aalajangersarneqassapput.

Imm. 3. Aningaasaqarnermut Siunnersuisoqatigiinnut allattoqarneq Aningaasaqarnermut Naalackersuisoqarfiup Nationalbanken-illu peqatigiillutik isumagissavaat.

Imm. 4. Naalackersuisut Aningaasaqarnermut Siunnersuisoqatigiit suleriaasissaat aalajangersarsinnaavaat.

Kapitali 8

Atuutilersinneqarnera ikaarsaarnissamilu aalajangersakkat

§ 47. Inatsisartut inatsisaat ulloq 1. januar 2017 atuutilissaaq, taamaattoq imm. 2. aamma imm. 3 takukkit.

Imm. 2. §§ 14-18 ulloq 1. juli 2016 atuutilissapput.

Imm. 3. § 26, imm. 3-5, aamma §§ 27-30 ulloq 1. januar 2018 atuutilissapput.

Imm. 4. Namminersornerullutik Oqartussat naatsorsuuseriveqarnerat il. il. pillugit Inatsisartut inatsisaat nr. 23, 3. november 1994-imeersoq, Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-imeersoq, Namminersornerullutik Oqartussat missingersuutaat pillugit Inatsisartut inatsisaata allannngortinneqarnera pillugu Inatsisartut inatsisaat nr. 1, 3. maj 2000-imeersoq aamma Kommunit aqunneqarnerat pillugu Inatsisartut inatsisaanni nr. 22, 18. november 2010-meersumi §§-it 40-50, kommunip aningaasanut tunngasutigut ingerlatsineranut tunngasut ulloq 1. januar 2017 atorunnaarsinneqassapput.

Imm. 5. Inatsisitigut najoqqutassat inatsisit aalajangersakkallu imm. 4-mi taaneqartut naapertorlugit atuutsinneqalersut atuutsiinnarneqassapput, Inatsisartut Inatsisaat manna naapertorlugu inatsisitigut najoqqutassanik taarserneqarnissaasa tungaanut.

Namminersorlutik Oqartussat, ulloq xx.xxx 2016

Kim Kielsen